



## 白花點

農場裡肚，幾下隻鴨嫲帶等自家个鴨子，有兜仔在籬笆脣尋蟲仔絡食、有兜仔在魚塘脣个壠坑學泅水。一隻隻个細鴨子，一身黃毛仔間(gam)等幾撮仔烏毛，係同鴨嫲比較起來，除仔色身無相同以外，該兜一絲絲个黃毛仔，仰仔都無鴨嫲一身个烏毛間等「白花」个毛恁好看。

鴨嫲開開翼該下，在厥兩片个翼胛項各有間等白花个毛，該兜白花个毛色同大隻个鴨仔打扮啊看起來盡靚、盡靚。大部分个鴨公、鴨嫲久久仔就會行到壠坑，係無就去到魚塘肚，佢等會用嘴銜等水去洗翼胛，同翼項分泥漿搵厝糟个鴨毛洗淨來。每一隻大鴨仔都係，大家人同毛洗淨來就係愛展該個白花點。

鴨嫲帶等鴨子學泅水該下，細鴨仔看等阿姆三不時就將毛洗啊淨淨，佢等恁毋解就問：「阿姆，你等做麼个恁好同該毛洗啊恁淨，尤其係翼胛个白花點洗啊恁靚？」

「該係鴨仔大隻地正會有个記號，大家人同佢洗淨來，正會好看，順續仔分人知自家變大人地！」鴨嫲笑微微仔同細鴨仔講：「等你等大咁！乜會不時同佢洗淨，同自家打扮啊靚靚！」

「阿姆，你看籬笆脣該有一隻大鴨公，佢緊搵地泥，同自家張啊一身泥，佢等看毋著厥翼項个白花點呢！」有一群細鴨子同自家个阿姆講。

「莫搭佢，該隻神經無正常。」鴨嫲用看人毋起个口氣講。

有一日，農場裡肚个鴨仔舉辦一年一擺个選美比賽，佢等愛比看啊麼人个毛色最靚？該「白花點」就係最重要个比賽項目。隻隻鴨仔開開翼就係愛分人看厥毛色，選美場所緊來緊鬧熱。其中有一隻細鴨子盡好膽，走去問該隻鴨公：「你仰毋同若毛洗淨來，好同大家人共下比靚？若身項搵啊一哪仔都係泥，毋會感覺自家蓋厝糟麼？」

聽著細鴨仔問地，該隻鴨公本本用嘴銜泥同該「白花點」搵啊厝厝糟糟。佢看著細鴨子企啊在脣口看等自家个動作，佢講：「同自家打扮啊恁靚做麼个？你還細，會覺著打扮啊靚靚正著，但係人毋係靚就好。再過講，花時間同自家打扮啊恁靚，毋當想辦法分自家健康就好。」佢又續等仔同頸根擲長啊講：「佢有發現該兜身項个『白花點』盡靚个鴨仔，等選美過後，主人就會來同佢等帶走，無再歸來這。」

「欸？帶走？」細鴨子打忸一下問：「無定著係帶去參加其他个選美活動啊？」

鴨公講：「莫戇地！佢等做鴨仔个，每日係有好食，平平安安過日仔就係最大个福氣！有兜个事情，無像你看著个恁單純。」

細鴨子聽著鴨公恁仔教訓佢，就共快走去選美个活動。這時節，堵好比賽到伸幾隻過靚个鴨仔還在相爭看麼人最靚。佢等「呱、呱、呱」大嫲聲喊：「佢係最靚个、佢係最靚个」麼人都毋讓麼人，場面緊來緊鬧熱地！

就在大家相爭無麼个輸贏該下，農場个主人來地！佢同該幾隻最靚个鴨仔聚概扭起來，放啊在籠仔肚帶走，佢歡歡喜喜講：「這幾隻鴨仔，佢有合意、佢有合意。」

該幾隻鴨仔在籠仔裡背還本本大嫲聲喊等：「佢係最靚个、佢係最靚个。」

作者：陳志寧

### ☆詞彙學習☆

【鴨子】ab` zii`：小鴨。

【幾撮仔】gi` zeb` e`：少量幾撮。

【壠坑】lag` hang`：小水溝。

【三不時】sam` bud` sii`：很常、時常。

【打忸一下】da` nug id` ha`：愣了一下。

【聚概】qiug` koi`：一概、全部。